




Broj/Број: 01/7-50-1-53-2-22/04
Sarajevo/Сарајево: 21.12.2004.



ZAPISNIK

sa 22-e sjednice Administrativne komisije Predstavničkog doma Parlamentarne skupštine Bosne i Hercegovine, održane u prostorijama institucija Bosne i Hercegovine dana 21.12.2004 godine, sa početkom u 13,15 sati. Sjednica je završena u 14,05 sati.

SJEDNICI SU PRISUSTVOVALI ČLANOVI KOMISIJE: Zorić Vinko, Felić Hazim, Ušanović Mubera, Jozo Križanović, Momčilo Novaković, Ivo Miro Jović, Nikola Špirić;

Dvadeset drugom sjednicom Administrativne komisije Predstavničkog doma Parlamentarne skupštine Bosne i Hercegovine, **predsjedavao je Vinko Zorić, prvi zamjenik** predsjedavajućeg Administrativne komisije Predstavničkog doma Parlamentarne skupštine Bosne i Hercegovine.

Za sjednicu je predložen sljedeći:

DNEVNI RED:

1. Usvajanje Zapisnika sa 20-e sjednice i verifikacija odluka 21-e sjednice Administrativne komisije;
2. Dogovor oko izrade Izvještaja o radu Administrativne komisije za period 01.07.-31.12.2004.

Dvadesetdrugu sjednicu Administrativne komisije Predstavničkog doma Parlamentarne skupštine Bosne i Hercegovine otvorio je predsjedavajući sjednicom Vinko Zorić i pozvao prisutne da se izjasne o predloženom dnevnom redu, odnosno daju svoje primjedbe, prijedloge i sugestije.

S obzirom da nije bilo prijedloga, primjedbi i sugestija na dnevni red, isti je dat na glasanje. Prisutni na sjednici su jednoglasno usvojili predloženi dnevni red.

Nakon usvajanja dnevnog reda dvadesetdruge sjednice Administrativne komisije Predstavničkog doma Parlamentarne skupštine Bosne i Hercegovine, pristupilo se razmatranju istog po utvrđenim tačkama.

AD-1 Zapisnik sa 20-e sjednice Administrativne komisije Predstavničkog doma Parlamentarne skupštine Bosne i Hercegovine usvojen je jednoglasno bez primjedbi.

Predsjedavajući sjednicom Vinko Zorić upoznao je prisutne članove Administrativne komisije sa Zabilješkom uz 21-u sjednicu Administrativne komisije. Prisutni članovi Administrativne komisije jednoglasno su verificirali odluke sa 21-e sjednice i usvojili:

ZABILJEŠKU

uz 21-u sjednicu Administrativne komisije Predstavničkog doma Parlamentarne skupštine Bosne i Hercegovine, planiranu za 02.12.2004. godine,

za koju je bio predložen:

DNEVNI RED:

3. Usvajanje Zapisnika sa 20-e sjednice Administrativne komisije;
4. Razmatranje zahtjeva poslanika Altić Muhameda za odobrenje naknade za odvojeni život i smještaj.

i pripremljena, kao dopuna dnevnog reda, tačka:

5. Donošenje odluke o prestanku stalnog profesionalnog radnog odnosa poslaniku Nikoli Kragulju;

Ad-1; Ad-2 i Ad-3 S obzirom da je 47-a sjednica Predstavničkog doma Parlamentarne skupštine Bosne i Hercegovine dana 02.12.2004. dugo trajala, članovi Administrativne komisije: Jozo Križanović, Momčilo Novaković, Mubera Ušanović, Hazim Felić, Ivo Miro Jović na prijedlog prvog zamjenika predsjedavajućeg Administrativne komisije Vinka Zorića su se pojedinačnim izjašnjavanjem složili:

-da prvi zamjenik predsjedavajućeg Vinko Zorić potpiše sa danom 02.12.2004. godine odluke koje su trebale biti donosene na 21-oj sjednici Administrativne komisije, i to:

1. Odluku o odobravanju naknade za odvojeni život poslaniku Muhamedu Altiću, počev od 01.12.2004.godine;
2. Odluku o prestanku radnog odnosa poslaniku Nikoli Kragulju, sa danom 12.11.2004. godine.

-da se na narednoj sjednici Administrativne komisije izvrši verifikacija odluka 21-e sjednice Administrativne komisije, sa danom 02.12.2004. godine.

Nakon završetka ove tačke dnevnog reda, prisutnim članovima se obratio Ivo Miro Jović sa prijedlogom da se na ovoj sjednici uvrsti u dnevni red tačka AD-3 - Razmatranje zahtjeva Ive Mire Jovića za odobravanje naknade za odvojeni život i smještaj počev od 01.01.2005.godine.

Prijedlog Ive Mire Jovića dat je na glasanje i prisutni članovi Administrativne komisije su jednoglasno usvojili dopunu dnevnog reda pod tačkom **AD-3** koja glasi:

AD-3 Razmatranje zahtjeva poslanika Ive Mire Jovića za odobrenje naknade za odvojeni život i smještaj počev od 01.01.2005.godine.

Nakon uvrštavanja u dnevni red nove tačke, članovi Administrativne komisije su nastavili sa razmatranjem utvrđenog dnevnog reda po usvojenim tačkama.

AD-2 Uvodno izlaganje o ovoj tački dnevnog reda dao je predsjedavajući sjednicom Vinko Zorić. Nakon uvodnog izlaganja predsjedavajućeg, detaljnije pojašnjenje stavki Izvještaja dao je sekretar Administrativne komisije Davorka Čaplinski. Imenovana je obrazložila, po stavkama, metod pristupa izradi Izvještaja. S obzirom na metodologiju u pristupu izradi Izvještaja, prisutni su upozoreni da bi bilo dobro da se odrede da li će se Izvještaj o radu Administrativne komisije za period od 31.07.-31.12.2004. godine raditi po istoj metodologiji kao prethodni, koji je na dnevnom redu 48-e sjednice Predstavničkog doma Parlamentarne skupštine Bosne i Hercegovine, zakazane za 22.12.2004. godine ili će se ovaj Izvještaj raditi na način koji se utvrdi na današnjoj sjednici.

Nakon ovih izlaganja za riječ se javio Momčilo Novaković, naglasivši da je forma Izvještaja za prvih 6 mjeseci prihvatljiva do strane 9, a da naredne strane Izvještaja stvaraju dilemu po pitanju predloženih zaključaka. Izrazio je mišljenje da je sa istim trebalo ići prema Kolegiju da se po njima izjasni i da on odredi koji od zaključaka treba da idu prema Domu. S obzirom da je Izvještaj na dnevnom redu Doma prema mišljenju imenovanog javlja se dilema da li se usvajanjem Izvještaja usvajaju i predloženi zaključci. U cilju otklanjanja nejasnoća Momčilo Novaković je predložio da se pri prezentaciji Izvještaja Administrativne komisije skrene pažnja Predstavničkom domu Parlamentarne skupštine Bosne i Hercegovine na činjenicu da Izvještaj Administrativne komisije sadrži i zaključke, te da se usvajanjem istog usvajaju i predloženi zaključci.

Nakon ove rasprave učešće u diskusiji su uzeli: Nikola Špirić, Zorić Vinko i Jozo Križanović koji je konstatovao da Izvještaj odražava ono što je Administrativna komisija radila u navedenom periodu, pa u skladu sa naprijed navedenim sadrži i zaključke koje bi Dom trebao usvojiti.

Pošto je završena rasprava po ovoj tački dnevnog reda Vinko Zorić je predložio da se na Kolegiju koji će se održati 22.12.2004. godine predloži da Izvještaj Administrativne komisije za period 01.01.-30.06.2004. godine bude razmatran kao jedna tačka dnevnog reda. Ujedno je konstatovao da će ovaj Izvještaj biti pokazatelj da li Izvještaj Administrativne komisije za period 31.07.-31.12.2004. godine treba raditi po istom modelu kao prethodni ili u pristupu izradi Izvještaja treba nešto mijenjati.

Prisutni članovi Administrativne komisije su jednoglasno donijeli:

ZAKLJUČAK

Za izvjestioca, na 48-oj sjednici Predstavničkog doma Parlamentarne skupštine Bosne i Hercegovine zakazanoj za 22.12.2004. godine, po Izvještaju o radu Administrativne komisije za period 01.01.-30.06.2004. godine imenuje se Vinko Zorić.

AD-3 Po ovoj tački dnevnog reda Ivo Mitro Jović je na sjednici Administrativne komisije predao svoj Zahtjev za odobrenje naknade za odvojeni život i smještaj počev od 01.01.2005.godine. Prisutni članovi Administrativne komisije jednoglasno su donijeli:

RJEŠENJE

1. Ivi Miri Joviću, poslaniku u Predstavničkom domu, odobrava se naknada za odvojeni život od porodice u iznosu od 400,00 KM mjesečno i naknada za zakup stana do 500,00 KM mjesečno, kao i pravo na naknadu troškova prijevoza, četiri puta mjesečno, do mjesta prebivališta njegove porodice.
2. Visina naknade za zakup stana regulisat će se ugovorom o zakupu.
3. Rješenje će se primjenjivati od 01.01.2005. godine.

Pošto je iscrpljen dnevni red 22-e sjednice Administrativne komisije Predstavničkog doma Parlamentarne skupštine Bosne i Hercegovine, pred zaključenje iste, Jozo Križanović je predložio tačku **Ad-4** Razno u okviru koje bi se razmotrilo:

- a) Pitanje Poslovnika o radu Predstavničkog doma Parlamentarne skupštine Bosne i Hercegovine.

Svoj prijedlog Jozo Križanović je obrazložio činjenicom da je Poslovnik o radu Predstavničkog doma Parlamentarne skupštine Bosne i Hercegovine urađen, te da nije pušten u proceduru po Poslovniku Predstavničkog doma Parlamentarne skupštine Bosne i Hercegovine ("Sl.glasnik BiH," br. 20/00). Imajući to u vidu, a posebno da je istim predviđeno formiranje jedinstvene Administrativne komisije, i činjenicu da je kraj godine najpogodniji momenat za formiranje iste, budući da ova komisija podnosi svoj izvještaj o radu, te da se nepotrebno dupliraju poslovi iz nadležnosti komisija oba Doma, predložio je da Administrativna komisija na današnjoj sjednici donese zaključak kojim bi se obavezao Kolegij da ubrza postupak oko donošenja Poslovnika.

Prijedlog Joze Križanovića za dopunom dnevnog reda jednoglasno je usvojen i uvrštena je tačka **Ad-4 Razno**.

AD-4 Po usvojenom prijedlogu Joze Križanovića za riječ se javio Nikola Špirić smatrajući da ne postoji potreba za donošenjem jednog takvog zaključka, prevashodno imajući u vidu da zastoj procedure oko donošenja Poslovnika ne utiče na rad Administrativne komisije. Po naprijed navedenom replicirao je Jozo Križanović i naglasio da je Poslovnik usaglašen, pa isti neopravdano stoji, odnosno nije stavljen u proceduru. Nadalje je istakao činjenicu da postoji određen zastoj u radu Komisije za finansijske i administrativne poslove Doma naroda, tako da se nepotrebno dupliraju poslovi oko rješavanja pitanja iz nadležnosti obje komisije, pa tim prije smatra opravdanim da se što prije formira jedna zajednička komisija oba Doma kako je to predviđeno navedenim Poslovnikom. Predsjedavajući sjednicom Vinko Zorić je podržao prijedlog Joze Križanovića.

Po ovom pitanju se opet javio Nikola Špirić i predložio da se o ovoj tački dnevnog reda uputi upit Kolegiju, te predloži da se ubrza postupak oko donošenja navedenog akta, odnosno pokrene inicijativa za formiranje jedinstvene Administrativne komisije. Pošto je zaključena rasprava o ovoj tački dnevnog reda, Administrativna komisija je jednoglasno donijela:

ZAKLJUČAK

Administrativna komisija Predstavničkog doma Parlamentarne skupštine Bosne i Hercegovine smatra da su se stvorili uvjeti za usvajanje Poslovnika o radu Predstavničkog doma Parlamentarne skupštine Bosne i Hercegovine, pa imajući to u vidu, traži od Kolegija Predstavničkog doma Parlamentarne skupštine Bosne i Hercegovine da joj odgovori kad će isti biti stavljen na dnevni red Predstavničkog doma Parlamentarne skupštine Bosne i Hercegovine.

U skladu sa naprijed navedenim Administrativna komisija Predstavničkog doma Parlamentarne skupštine Bosne i Hercegovine predlaže Kolegiju da se ubrza inicijativa oko formiranja jedinstvene Administrativne komisije kako se ne bi duplirali poslovi oko rješavanja pitanja koja su u nadležnosti Administrativne komisije Predstavničkog doma i Komisije za finansijske i administrativne poslove Doma naroda Parlamentarne skupštine Bosne i Hercegovine.

U okviru tačke **AD-4** Razno predloženo je od strane članova Administrativne komisije da se pokrene inicijativa prema Sekretaru Predstavničkog doma po pitanju Prijedloga Zakona o pravima i dužnostima članova Parlamentarne skupštine Bosne i Hercegovine. Po ovom pitanju Administrativna komisija je pod **tačkom b)** jednoglasno donijela:

ZAKLJUČAK

Administrativna komisija Predstavničkog doma Parlamentarne skupštine Bosne i Hercegovine traži od Sekretara Predstavničkog doma Parlamentarne skupštine Bosne i Hercegovine da istraži gdje je zastao Prijedlog Zakona o pravima i dužnostima članova Parlamentarne skupštine Bosne i Hercegovine i o tome informira Administrativnu komisiju Predstavničkog doma Parlamentarne skupštine Bosne i Hercegovine.

Administrativna komisija Predstavničkog doma Parlamentarne skupštine Bosne i Hercegovine sugeriše da se procedura oko Zakona iz stava 1 ovog zaključka završi u skladu sa Poslovníkom Predstavničkog doma Parlamentarne skupštine Bosne i Hercegovine.

U okviru iste tačke **Ad-4** pod **tačkom c)** Jozo Križanović je informisao prisutne zašto je Komisija za ostvarivanje jednakosti spolova, čiji je on predsjedavajući, predložila Zakon o izmjeni Zakona o radu u institucijama Bosne i Hercegovine ("Sl.glasnik BiH," br. 26/04). Prisutni članovi Administrativne komisije primili su k znanju ovu informaciju.

Pošto je iscrpljen dnevni red i njegove dopune utvrđene tokom sjednice, predsjedavajući 22-om sjednicom Administrativne komisije je istu zaključio u 14,05 sati.

Sekretar
Administrativne komisije
Davorka Čaplinski

Prvi zamjenik predsjedavajućeg
Administrativne komisije
Vinko Zorić